

Tabell C-k

Saker med særskild fordeling. Kommunane.

Følgjande saker er gitt ei særskild fordeling innanfor innbyggjartilskotet i 2015:

Kol.	Sak	Departement	Beløp i 1 000 kr
1	Inndelingstilskot	KMD	99 293
2	Trekk Nannestad og Ullensaker	KMD	-19 350
3	Helsestasjons- og skulehelseteneste	HOD	385 400
4	Utdanning av deltidsbrannpersonell	JD	36 973
5	Overtaking av ansvar for Hunstad skule	KD	4 757
6	Utrekk avgiftslette differensiert arbeidsgjevaravgift		-267 000
7	Korreksjon kommunal medfinansiering statleg barnevern, Oslo kommune		-26 012
8	<i>SUM</i>		<i>214 061</i>

Kolonne 1 – Inndelingstilskot

Inndelingstilskotet blir gjeve som kompensasjon til kommunar som sluttar seg saman. Inndelingstilskotet blir fryst reelt i 15 år, og blir deretter trappa gradvis ned over 5 år. Inndelingstilskotet blir omtalt nærare i innleiinga og i kapittel 18.2 i St.prp. nr. 64 (2001–2002) *Om lokaldemokrati, velferd og økonomi i kommunesektoren 2003*. I 2015 blir det gjeve inndelingstilskot til seks kommunar (kommunane Re, Vindafjord, Aure, Bodø, Kristiansund, Inderøy og Harstad).

Kolonne 2 – Trekk Nannestad og Ullensaker

Nannestad og Ullensaker har i perioden 1993–2008 motteke finansieringsbistand i form av skjønsmidlar i samband med etableringa av Oslo Lufthamn, Gardermoen. Totalt har kommunane motteke 735,5 millionar kroner, der 387 millionar kroner skal betalast tilbake i 20 like store avdrag frå og med 2009. Dette blir gjort ved eit trekk i rammetilskotet til Nannestad og Ullensaker på 7,43 og 11,92 millionar kroner årleg t.o.m. 2028.

Kolonne 3 – Helsestasjons- og skulehelseteneste

Som varsla i kommuneproposisjonen for 2015 er 200 mill. kroner av veksten i kommunesektoren sine frie inntekter grunngeve med styrking av helsestasjons- og skulehelsetenesta og jordmortenesta. I statsbudsjettet for 2014 vart 180 mill. kroner av veksten i kommunesektorens frie inntekter grunngeve med behovet for styrking av helsestasjons- og skulehelsetenesta. Midlane blei fordelte til kommunane basert på innbyggjarar i alderen 0–19 år, med eit minstenivå på 100 000 kroner per kommune (pga. prisjustering blir minstenivået 101 000 kroner i 2015). Styrkinga i statsbudsjettet 2015 av helsestasjonstenesta, inkludert skulehelsetenesta og jordmortenesta, blir føreslått fordelt etter den same nøkkelen og plassert i tabell C.

Kolonne 4 – Utdanning av deltidsbrannpersonell

For å leggje til rette for å auke utdanninga av deltidsbrannpersonell, er 36,9 mill. kroner av rammetilskotet fordelt særskilt til kommunar ut frå talet på deltidsbrannpersonell i kvar kommune. Der det er vertskommunesamarbeid om brannvesen er midla fordelte til vertskommunen. Regjeringa legg til grunn at vertskommunane sørgjer for at midlane kjem alle kommunane i samarbeidet til gode.

Kolonne 5 – Overføring av Hunstad skule frå Statped til Bergen kommune

Etter avtale mellom Bergen kommune og Kunnskapsdepartementet blir skuledrifta ved Hunstad skule overført frå Statped til Bergen kommune frå skuleåret 2014/2015. Som følgje av dette blir rammetilskotet auka med 1,9 mill. kroner i 2014. I statsbudsjettet for 2015 blir vøreffekten av overføringa føreslått kompensert med ein auke i rammetilskotet på 2,8 mill. kroner. Midlane vil i 2015 bli fordelt særskild til Bergen kommune. Frå og med 2016 vil midlane bli fordelte etter dei ordinære kriteri i inntektssystemet.

Kolonne 6 – Uttrekk – avgiftslette differensiert arbeidsgjevaravgift

Dagens ordning med differensiert arbeidsgjevaravgift er revidert som følgje av nye retningslinjer for regional støtte. Dei nye retningslinjene gjeld frå 1. juli 2014 til 31. desember 2020. 31 kommunar får avgiftslette rekna til 267 mill. kroner i 2015, som blir trekte ut av rammetilskotet i 2015. I Prop. 1 S (2014–2015) er det ein nærare omtale av saken.

Kolonne 7 –Korreksjon barnevern, uttrekk Oslo kommune

I 2015 blir det lagt inn 160 mill. kroner i rammetilskotet som følgje av auka kommunal medfinansiering av det statlege barnevernet. Denne endringa gjeld ikkje Oslo kommune, som og har ansvaret for det statlege barnevernet i Oslo.

Midlane skal fordelast etter delkostnadsnøkkelen for barnevern til alle kommunar, unnateke Oslo. Kostnadsnøkkelen er i 2015 endra for alle kommunar for å ta omsyn til dette, og barnevernsnøkkelen er korrigert slik at totalbeløpet til kommunane unnateke Oslo utgjer 160 mill. kroner. Sidan det ikkje er mogleg å halde Oslo utanfor ei fordeling etter barnevernsnøkkelen, mottek Oslo om lag 26 mill. kroner gjennom kostnadsnøkkelen til dette formålet i 2015. For at Oslo skal gå i null blir det lagt inn ein korreksjon på -26,012 mill. kroner i tabell C i 2015 . I statsbudsjettet for 2016 vil denne korreksjonen bli gjort permanent ved at beløpet blir flytta frå Oslo som fylkeskommune til Oslo som kommune (flytting frå kap. 572 til kap. 571).

Kolonne 8 – Sum saker med særskild fordeling

Summen av kolonnane 1 – 7. Talet er nytta i tabell 2-k, kolonne 3. Tilskota er lagde inn i inntektssystemet, og er i hovudsak haldne utanfor berekninga av inntektsgarantiordninga.